

大鵬賦·並序

余昔於江陵，見天台司馬子微，謂余有仙風道骨，可與神遊八極之表。因著《大鵬遇希有鳥賦》以自廣。此賦已傳於世，往往人間見之。悔其少作，未窮宏達之旨，中年棄之。及讀晉書，睹阮宣子《大鵬讚》，鄙心陋之。遂更記憶，多將舊本不同。今腹存手集，豈敢傳諸作者，庶可示之子弟而已。

其辭曰：

南華老仙發天機於漆園，吐崢嶸之高論，開浩蕩之奇言，徵至怪於齊諧，談北溟之有魚。吾不知其幾千里，其名曰鯤。化成大鵬，質凝胚渾。脫髣髴於海島，張羽毛於天門。刷渤澥之春流，晞扶桑之朝暾。烜赫乎宇宙，憑凌乎崑崙。一鼓一舞，煙濛沙昏。五嶽爲之震落，百川爲之崩奔。

乃蹶厚地，揭太清。互層霄，突重溟。激三千以崛起，向九萬而迅征。背巢太山之崔嵬，翼舉長雲之縱橫。左迴右旋，倏陰忽明。歷汗漫以夭矯，扛閭闔之崢嶸。簸鴻蒙，扇雷霆，鬥轉而天動，山搖而海傾。怒無所搏，雄無所爭。固可想象其勢，髣髴其形。

若乃足縈虹蜺，目耀日月。連軒沓拖，揮霍翕忽。噴氣則六合生雲，灑毛則千里飛雪。邈彼北荒，將窮南圖。運逸翰以傍擊，鼓奔飈而長驅。燭龍銜光以照物，列缺施鞭而啓途。塊視三山，杯觀五湖。其動也神應，其行也道俱。任公見之而罷釣，有窮不敢以彎弧。莫不投竿失鏃，仰之長吁。

爾其雄姿壯觀，塊軋河漢。上摩蒼蒼，下覆漫漫。盤古開天而直視，羲和倚日以旁歎。繽紛乎八荒之間，掩映乎四海之半。當胸臆之掩晝，若混茫之未判。忽騰覆以迴轉，則霞廓而霧散。

然後六月一息，至於海湄。欸翳景以橫翥，逆高天而下垂。憩乎泱泱之野，入乎汪漭之池。猛勢所射，餘風所吹。溟漲沸渭，巖巒紛披。天吳爲之怵慄，海若爲之躑躅。巨鯨冠山而卻走，長鯨騰海而下馳。縮殼挫鬣，莫之敢窺。吾亦不測其神怪之若此，蓋乃造化之所爲。

豈比夫蓬萊之黃鵠，誇金衣與菊裳？恥蒼梧之玄鳳，耀綵質與錦章。既服御於靈仙，久馴擾於池隍。精衛勤苦於銜木，鷄鵒悲愁乎薦觴。天雞警曙於蟠桃，踞烏晰耀於太陽。不曠蕩而縱適，何拘攣而守常？未若茲鵬之逍遙，無厥類乎比方。不矜大而暴猛，每順時而行藏。參玄根以比壽，飲元氣以充腸。戲暘谷而徘徊，馮炎洲而抑揚。

俄而希有鳥見謂之曰：「偉哉鵬乎，此之樂也。吾右翼掩乎西極，左翼蔽乎東荒。跨躡地絡，周旋天綱。以恍惚爲巢，以虛無爲場。我呼爾遊，爾同我翔。」于是乎大鵬許之，欣然相隨。此二禽已登於寥廓，而斥鷃之輩，空見笑於藩籬。

上李邕

大鵬一日同風起，搏搖直上九萬里。
假令風歇時下來，猶能簸卻滄溟水。
世人見我恆殊調，聞餘大言皆冷笑。
宣父猶能畏後生，丈夫未可輕年少。

古風（其三十三）

北溟有巨魚，身長數千里。
仰噴三山雪，橫吞百川水。
憑陵隨海運，燁赫因風起。
吾觀摩天飛，九萬方未已。

臨路歌

大鵬飛兮振八裔，中天摧兮力不濟。
餘風激兮萬世，遊扶桑兮挂石袂。
後人得之傳此，仲尼亡兮誰爲出涕。